


www.BibleForChildren.org

Mahte 26



Lätnak Pawi a
phanak vai a
mhnüp khyuk üng,
thi se a mthawh be
Lazaruha venak, Bethanih
mlüha Jesuh pha lawki.
Marih naw aktäa a phu
küikia natuh ksi ng'ui liter
uma cäpcäp lawpüi lü,
Jesuha khaw jah buiki naw a lusam
am a xuh pet. Acuna ksi ng'ui cun
im k'um naküt üng ng'uiki.




Acunüng Judah Iskarot, xaleinghngih he üngka mat cun
Jesuh ceng khaia ktaiyü ktung hea veia citki. A pyen
ami ngjak üng aktäa je na u lü, ngui
ami pet vaia ami khyütamnak.


Acunüng, Judah naw a jah
kpanaksak vaia kcün suiki.



Jesuh naw a jah mtheha mäiha
axüisaw he naw Lätnak pawî buh
pyang vaikie. Acukba ami ei k'um
üng, Jesuh naw muk lo lü ktaiyü ma
lü boki naw, axüisaw he üng a jah pet.
"Lo u lü, ei ua; hin hin keia mtisa ni,"
a ti.



Acunüng, Jesuh naw khawt lo lü
Pamhnam üng jenak mtheh lü
axüisaw he üng a jah pet. "Nami van
naw hin aw ua. Hin hin ka thisen,
Pamh-nama khyütamnak kthai,
khyang khawhah mkhyekatnak
mhlättnak vaia lawngki ka thisen ni."



“Sihmon, Sihmon, Ngaia! lomah naw angsi kphya am a mkhyaha kba, khawyam naw a ning hlawhlepnak vaia akhawn yah päng ve, “Cunsepi, na jumnak am a khyühnak vaia, ka ning ktaiyü peki ni; ka veia na nghlat law be üng, na bena he jah khängsak kaw pi,” a ti. Pita naw, “Bawipa aw, na veia ta thawngim la thihnak üng pi ka ceh vai ling veng,” a ti.

Jesuh naw, “Pita aw, ka ning mthehki, tuhngawi ai am khawng pha se, ‘Ani am ksing nawng’ ti lü kthum vei na ngcim khai,” a ti.



Acunüng, Jesuh axüisaw he
am alanga, Ketaseman ami
tinaka hnün mat ami pha
law üng, axüisaw he üng,
“Caia ka va ktaiyü k’um
üng, hin üng a na ngaw
ua,” a ti. “Ka Pa aw, ka pa
aw! Nang üng avan kya
theiki ni. Hina khuikhanaka
khawt hin ka khan üngka naw
loa. Cunsepi keia ngjakhlüa
am ni na ngjakhlüa kyase,” ti
lü ktaiyüki.



Judah ngvawng da citki. Romah yekape, ktaiyü ngvaie ja Pharisee naw ami jah tüi law Temple ngängkia khyange avang jah lawpüi se, mthikcime, meiim ja ngtukmei jah kawteikie cun acuia a jah lawpüi. Acunüng mat naw ktaiyü ngvai säiha m'yaa nghngakawi kpat lam a ksawm pat. Jesuh naw, "Khäk ve," ti lü a nghngakawi hnet se daw beki.



Jesuh kpang u lü cehpüiki he naw ktaiyü ngvaia ima
ami luhpüi. Acunüng, Pita naw athuknak üngka naw a
läk hnga. Imngvawng mkawt
nglung üng mei awm u lü
ngaw u se Pita ami
ksunga va ngaw hngaki.




Ktaiyü Ngvai säiha a
mpya Pita naw a nghnga
a ksawm pata a
mjükphyüi mat naw,
“Ani am ngvawnga ve
niki se ka ning jah hmuh
am ni mä?” a ti. Pita a ngcim
betü ja; ainghlüi khawngki.
Acunüng, Pita kpunga cit
lü aktäa kyapki.




Acunüng ngbumki he ami van tho
law u lü Jesuh Pilata veia cehpüi
u lü, Pilat naw, "Judah hea
sangpuxanga na kyaki aw?" ti lü
kthäh se, Jesuh naw, "Ä,
na pyena kba kya veng,"
ti lü a msang. Pilat naw
Jesuh a mhlät vai ngaih lü
a jah kthäh be. Cunsepi
ngpyang u lü, "Kutlamktung


üng taiha, Kutlamktung
üng taiha," ami ti.




Acunüng, Pilat naw Jesuh cun
kutlamktung üng taih vaia a jah
msum. Jesuh cun ami cehpüi.
Jesuh naw amäta phäha
kutlamktung kawt lü 'Luyuh
Hnün' ami ti, Hebru läk am
Kolkothaa citki.



Acuia kutlamkung üng khyang
nghngih am ami jah taih yüm.
A peia mat cim jah taih u lü
Jesuh anglung üng ami taih.



Acunüng Temple üng jihnu, anglung üng nghngiha tek lawki. Acunüng, Jesuh naw angsanga, "Ka Pa aw, na kut üng ka ngmüimkhya ning pe veng," a ti. Acun ti lü thiki.



Josep Arimahte cun khawmü lama pha lawki. Ani cun Pamhnama Khaw a pha law vai a na ngängki, aktäa ami leisawng kawngci ngvaia kyaki.

Acuna ngcüngceinaka mhmüp (Sabbath a phanak vai mhmüp mat) üng Pilata veia cit


lū Jesuha yawk a kthäh.
Acunüng Josep naw jih kthai khyei lū, Jesuha yawk cun la lū, jih am hlawp lū, lung ami cawh ng'utnaka ng'uhnüna k'uma ta lū, lungnu am mkawt a khaih hüt.



Angawi, Sabbath mhnüp üng, ktaiyü
ngvaie ja Pharise he Pilata veia
ngcun lawki he. "Saja aw,
jah mhleimhlaki naw a
xün ham üng, 'Amhnüp
kthum üng ka tho be
khai' a ti kami sümki."

Acunüng mtät khaia
yekape am cit u lü
lung cun

msingnak
am msing
u lü lungdü
cun mtätkie.



Sabbath këna, amhnüp khyühnak
ngawilam, khaw athaih law hlü
hnüh üng, Marih Makdalin ja
a püi Marih kce mat am,
ng'utnak teng khaia
cetki xawi. Pamhnama
khankhawngsä mat
khankhaw
üngkhyüh kyum
law se,


ngkhyü aknuia
ngsünki. K'utnak
mkawta lungnu
mkawt üngka
ktawngin lü lunga
khana ngawki.




Mkawt mtäte naw khankhawngsä
cun hmu u lü kyühei ngen
u lü akthi kcea
mäiha awmki he.




Khankhawngsä naw nghnumie üng,
“Käh kyühei ua, kutlamktung üng
ami taih Jesuh nami sui hüki
ti ka ksingki. “Ani hia am
ve; a pyena kba, tho be
pängki ni. Hia law lü
Bawipaa ngkawhnak
teng law ua.”



Acunüŋ kyühnak ja aktää jenak am,
lungdü üngkhyüh cet lü axüisaw he
üŋ jah mtheh khai hea dawngkie.
Ahunata Jesuh naw lama jah na
khyum lü, "Dimdeihnak am ve
ua," ti se, law u lü, a khawe
jah mhjut mtham u lü
hjawkhahkie.





Anghnua Jesuh axüisaw xaleiat he ami ei ana ei k'um u
se ami veia ngdangki. Jesuh a thawh be käna hmukia
khyang he am ami jah kcangnak la ami mlunga
nghlanga phäha a jah ksenak. Bawipa Jesuh ami veia
ngthuhei päng lü khankhawa kai be lü Pamhnama
kpat lama ngawki.



Pamhnam naw khawmdek a
mhläkphyanak leng lenga phäh a
Capa mat däk a jah pet. Ani jumki
naküt cun käh thi ti lü angsäia
xünnak yah khaie.



Romah 3:23 khyang naküt mkhyekat lü Pamhnama hlüngtainak üngka naw thuk vaikie.

Romah 6:23 Mkhyeatnaka phu cun thihnaka kyaki cunsepi, Pamhnam naw amdang a jah yeta a bähäknak cun mi Bawipa Jesuh khritaw üng anglät xünaka kyaki.

Hebru 9:27 Khyang avan ahun thi lü acun käna Pamhnam naw ngthu jah mkhyah khai.

Ephet 2:8,9 Pamhnama bähäknak üng jumnak üngkhyüh küikyannak nami yahki. Ahin cun namimäta mtunkthaeinak am kya, lüpi Pamhnam naw ajüa aning jah yet ni, acuna kyase u pi käh camcah kawm.



Romah 10:9,10 "Na mlung am Jesuh cun Bawipa ni tia pyen lü, thihnak üngka naw Pamhnam naw mthobeki tia na mlung k'uma na jum üng küikyannak na kya khai" ti cen. Mlung k'uma jumnak am Pamhnam üng ngsungpyunnak mi yahki; mpyawng am pyen lü khyang naw küikyannak yahki.

Johan 3:16,17 "Pamhnam naw khawmdek a mhläkphyanak leng lenga phäh a Capa mat däk a jah pet. Ani jumki naküt cun käh thi ti lü angsäia xünnak yah khaie. "Pamhnam naw a Capa, khawmdeka a tüih law cun ngthumkhyah khaia a tüih law am ni. Khawmdek küikyan Bawi vaia a tüih law ni."

1 Johan 5:11-13 Saksinak ta: Pamhnam naw angsäia xünnak jah pe ve, angsäia xünnak cun a Capa üng ni a ngphungei ta. A Capa yaheiki naküt naw xünnak yahki. Pamhnama Capa am yaheiki naw ta xünnak am yah. Pamhnama Ca jumeiki naküt naw angsäia xünnak yahki ti nami ksing vaia phäh ahina kca ka ning jah yuk law ni.



Mahte 26-28; Luhka 22-24; Johan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Dai NT (dao) © The Word for the World International and
North East Centre for Training and Research, 2018.

<https://www.bible.com/bible/2446/MAT.1>

©2026 Bible for Children, Inc.

www.M1914.org

www.bibleforchildren.org

